

## Յ Ե Թ Ե Զ Ը Բ Ը Ն

Եւրոպական ազգերի գրականութեան մէջ ժողովրդական բանաստեղծութիւնը նշանաւոր տեղ է բռնում. նորա՝ իբրև քաղաքակրթութեան աւելի բարձր աստիճանի ազգեր՝ շուտ կարողացան ըմբռնել ժողովրդական բանաստեղծութեան արժէքը, ուստի և ոչ մի ջանք չենայեցին կատարելապէս ուսումնասիրելու այդ առարկան և օգտակար գիտութիւնների շարքը դասելու:

Անցեալ դարու վերջերից արդէն ժողովրդական բանաստեղծութիւնը գիտնական աշխարհի զբաղման և հետաքրքրութեան նիւթ դարձաւ. ոչ միայն անհատներ, այլ և ընկերութիւններ անգամ կազմուեցան ժողովրդական կեանքի և մասնաւորապէս անգիր բանաստեղծութեան ուսումնասիրութեամբ զբաղուելու համար: Գրիմ եղբայրների և նոցա հետևողների ջանքերով ժողովրդական բանաստեղծութիւնը արհամարհանքի աստիճանից լուրջ գիտութիւնների կարգը բարձրացաւ:

Ժողովրդական բանաստեղծութիւնը<sup>1)</sup> գրականութեան մի ճիւղն է, երկուսն էլ մարդկային մտքի, զարգացման և երևակայութեան արդիւնք. միայն մէկը անհատի, միւսը բազմութեան ստեղծագործութիւն է. մէկի մէջ երևում է բանաստեղծի անձնաւորութիւնը, միւսի մէջ ժողովրդի հոգեկան դրոշմը:

Ժողովրդական կեանքի և գաղափարների բնական արտացոլումն է բանաստեղծութիւնը, որ իւր պարզ և անպաճոյճ ձևերով, ներքին և արտաքին ներգաշնակութեամբ, բարձր գաղափարներով և ազնիւ զգացումներով նշանաւոր տեղ է բռնում գեղարուես-

<sup>1)</sup> «Բանաստեղծութիւն» գործ ենք սծում այստեղ ժողովրդական անգիր գրականութեան նշանակութեամբ: